

畿輔通志卷二百八十五

列傳九十三 列女四十一

國朝三十五 定州 深

國朝

定州

郝浴繼室王氏有賢行從浴在奉天凡五年卒浴原配李死

戊寅難已見前傳

汪琬撰墓誌銘

庠生徐承命妻趙氏夫亡子幼舅姑皆老守節五十餘年康

熙四十四年旌

雍正志作五
十三年旌

子九錫官鴻臚寺序班

雍正志
兼採州

舊志

陳尙貴女三姐

大清一統志

年十三

雍正志

母命採桑尙貴族姪文

秀醉歸欲污之女喊詈不從秀鬱割而死時康熙四十六年

四月十八日也事聞旌表如例

州新志

崔有貴女大姐楊天喜女大姐年各十七崔女偕弱妹獨處鄰惡李之好入室調之女不受辱羞忿自經死楊女摘豆於野族惡有印欲強污之女堅拒不從被勒死有印畏罪自盡

時康熙五十二年事聞旌表

同上

耿歷妻任氏年二十五守節孝事孀姑并迎養繼母閱四十年嗣子介淑舉人同時胡國俊妻王氏年二十二撫孤守節歷四十餘年又趙大用妻張氏年十九守節孝事舅姑歷三十餘年雍正五年并旌

雍正志兼
採州舊志

楊昇妻甄氏年二十二夫亡守節夫叔屢欲嫁之凌虐百端不從孤子文憲庠生歷五十六年雍正六年旌

大清一統
志兼採州舊

志

李洪圖妻沈氏年二十三夫亡姑老子幼同時祁顯名妻高

氏年二十三夫亡趙來貴妻尙氏年二十九夫亡高明妻王氏李中權妻許氏年各二十五夫亡趙延瓚妻何氏年十八夫亡事孀姑均盡孝撫孤子成立守節各數十年卒以上雍正

正六年并旌

雍正志兼
採州舊志

監生鄭愷妻李氏年二十夫亡孝事舅姑姑晚歲失明事之尤謹撫夫姪爲嗣苦節三十餘年同時李應夏妻胡氏張三貴妻郝氏年各二十二夫亡事舅姑姑均以孝著郝訓子成立守節六十年胡子尋天苦節四十年以上并於雍正六年旌史直妻柴氏年十九夫亡孝事舅姑席賓妻王氏年二十二夫亡事姑均守節三十餘年雍正七年并旌

田進賢妻劉氏年十九夫亡撫嗣子成立守節四十年趙直妻胡氏年二十六守節訓子遇隆入武庠雍正八年并旌

庠生王德昌妻劉氏年二十一夫亡姑病瘋卧床八年氏扶

持奉養不少懈訓嗣子炯入庠同時庠生王德溥妻李氏年

十七夫亡善事舅姑撫嗣子守節三十五年杜進登

雍正志作登進

妻楊氏年二十夫亡事姑孝撫子成立娶媳子復天與媳王

氏同守節以終又賈玠妻劉氏年二十玠卒孝事孀姑撫嗣

子守節四十餘年又張鵬翼妻溫氏夫早亡撫孤守節與孀

姑同卧起者三十年卒年五十有八以上均於雍正十年旌

監生王之棟妻楊氏年二十七夫亡孝養孀姑撫嗣子守節

三十年雍正十二年旌

俱同上

監生張秉公妻王氏年十五于歸越十載夫亡遺腹生子介

福族人覬其產謀斃遺孤氏攜介福依外家苦守訓之成立

同時崔文高妻高氏年二十四撫孤守節四十餘年雍正十

二年并旌

州舊志

方宏業妻趙氏年十九夫亡奉姑守節

副貢生郝良彥妻焦氏夫亡撫孤入庠

俱同上

支北哥妻焦氏婚數月夫外出姑適歸甯鄰惡楊三瞞其獨處入室挑之氏峻拒姑同哭訴乘間自經乾隆元年旌

州新志

溫亮山女二姐年十三同村楊三詭言其嫂邀之與同行至村西畔欲強逼之女喊拒不受辱三恐聲聞拾磚毆之死乾隆三年旌

庠生吳何畏妻王氏年二十六夫亡孝事舅姑詩書訓子以樂善稱卒年九十七歲同時庠生李盛芳妻甄氏年二十六夫亡養親教子皆盡職卒年八十有四乾隆三年并旌

王文臣妻王氏以楊三調戲羞忿自盡同時龐喜文妻劉氏

被龐全圖姦未成羞忿自縊王以乾隆七年旌劉於乾隆十
五年旌

趙棟妻張氏趙梧妻胡氏娣姒也年皆十六于歸張越三年
胡越二年夫亡事孀姑均孝張子女尋天孤守以終胡撫遺
腹子守節二十八年卒乾隆八年并旌

李文章妻邸氏年二十三夫亡欲從死以親老子幼矢志苦

守卒年五十有五乾隆九年旌

案舊志有李文章妻邸氏年二十六夫故子梅甫三月食

貧操作以養二老及殯哀毀幾致喪明存年七十有六與此同名而守節年歲各異州志并存故附著之

張籃子妻王氏以孟保兒調戲羞忿自經同時耿運聖妻劉
氏以張狗兒圖姦不從亦羞忿自經死王於乾隆十九年劉
於二十二年先後旌

王維藩妻馬氏年十九夫亡舅姑皆老訓姪成名守節三十

一年乾隆三十三年旌

王玉妻李氏年十九夫亡事舅姑撫幼子成立存年五十有

四乾隆三十八年旌

案續志載北宮城王玉妻李氏年二十

一守節撫子明珠成立卒年七十三歲

乾隆四十年旌守節旌

表年分小異疑重出

李靈妻王氏以韓二成調戲羞忿自經乾隆四十七年旌

竇尙義妻劉氏年十九夫亡事舅姑孝姑壽近百齡課子立

興入庠卒年七十有五乾隆五十四年旌

孫彥妻夏氏年二十五彥貿易關外病歿氏聞訃守節存年

六十有八乾隆五十五年旌

王豐功女淑姐乾隆五十八年年十七摘豆於野同村劉虎

兒者欲強污之淑姐力拒罵詈虎兒持刀剗其腹腸且出遁

去其母至女被傷卧地女語母畢氣乃絕州牧郭置虎兒於

法表其門俱同上 案烈女以道光二十九年補旌

邊某妻楊氏年一百二歲韓某妻李氏年一百一歲嘉慶四年五年先後奉

旨賞賜緞疋銀均建坊旌表冊

楊治家妻劉氏被楊杰調戲羞忿服毒死嘉慶十七年旌

新州

志

張洛興妻王氏夫亡守節道光七年其夫族兄洛定謀奪其志氏乘間投井死道光八年旌

王義動妻宋氏年二十七夫亡撫子守中矢志孫聘三入庠道光九年旌

魏胖妻齊氏被魏名子持刀逼姦未成氏忿欲自盡姑防之嚴嗣胖兒糾人將名子致死氏乘間仍自經同時康狼兒妻

安氏以張五索欠穢語詈罵羞忿自經齊以道光十四年旌
安後齊八年旌

王致中妻許氏年十八夫亡撫嗣子守節氏樂善好施嘗捐
金修學署道光十五年旌

庠生王曰禹妻劉氏年十九夫亡舅鰥居失明氏撫孤子崑
入庠年三十八歲卒道光九年旌

俱同上

李澤妻王氏年二十二夫亡撫孤守節卒年八十有六同時
薛可仕妻王氏年亦二十二夫亡事親撫孤守節已五十一
年道光二十一年二十二年先後旌

州志

鄭湛妻何氏年二十夫亡孝事舅姑王璧妻李氏年二十夫
亡孝事舅姑撫子汝金入庠何以道光二十五年李以道光

二十九年旌

州志

張虎兒妻王氏歲歉家貧夫家將鬻之氏投繯死道光二十九年旌

彭俊女增兒幼許字王姓女年十八而王氏子夭卽矢志事母終身不改字母故撫四歲弱弟成立道光二十九年旌女年已六十五歲

申周屏妻劉氏年二十夫亡子德基生甫九日守節五十五年同時何金佩妻胡氏年十九夫亡守節五十七年學政徐劉先後旌其門

楊魁先妻張氏年二十夫亡守節卒年六十州牧旌其門

劉宣妻吳氏年二十三守節姑病痿舅病癱吳侍兩親厯數年不倦訓子鶴鳴入庠守節四十四年卒學政杜旌其門

監生王柱琴妻劉氏年三十夫亡守節事親撫孤卒年七十

有八學政杜旌其門

郭建勲妻田氏年三十夫亡孀姑失明病痿氏晝夜扶掖奉養二十年事瞽嫂趙氏如姑訓子登科登高皆入武庠壽七十有六學政呂旌其閭

何泰來妻王氏年二十六撫孤守節事孀姑孝訓孫學詩入庠卒年八十有一州牧旌其門

賀得志妻劉氏年二十一夫亡子幼族人覬其產百計逼嫁氏自經以救免後子孫繁衍五世同堂壽八十有一

李鍾華妻張氏年二十八夫亡子本漢旣娶而卒姑媳相依同守節張壽九十有一

董瑞蓮妻楊氏年十九于歸六月而寡撫夫姪占龍守節四十年

劉元智妻陳氏年十九寡繼姑悍甚事之惟謹撫嗣子守節五十二年學政旌其門

秦金聲妻劉氏年十九于歸秦未旬日金聲遠出歷五十餘年無音耗氏撫嗣子守貞至七十歲卒同時王自元妻王氏年二十七夫外出不歸氏撫子成立事親孝又耿金環繼妻馬氏年二十五金環外出不歸馬偕孀姑同寢處終身撫嗣子成立均以節終

楊廷輝妻狄氏年二十四守節姑老病與姑同處者四十二年訓嗣子入監卒年八十有二同時監生王思道妻曹氏年二十八夫亡舅病痿卧床數載氏竭力奉養不懈訓孫入庠守節三十餘年卒

武生宋飛熊妻許氏年三十夫亡姑病涕泣虔禱姑疾爲愈

壽至九十有五乃卒貧無以葬日夜悲號忽竈土墳起掘之得金賴以營葬手錄四子書唐詩課子成誦遠近稱賢卒年七十有四

邱夢說妻李氏年二十一守節姑病廢負以出入者十餘年撫子及孫守節五十五年同時王二成妻李氏年十九于歸未兩月夫亡撫嗣子清守節孝事舅姑未幾清卒撫姪孫大元爲嗣大元復早卒與孫媳相依苦守卒年七十有一

張興震妻劉氏年二十七夫亡家極貧遺腹生子全義事親孝養有加日啖糠粃守節二十二年

呂居威妻劉氏夫亡誓死舅姑勸止之遺腹生子保守節四十六年卒年六十有五學政旌其門

庠生申黌妾王氏年二十九黌與嫡室相繼歿撫幼子成立

守節已四十五年

米廷英妻趙氏年二十五夫亡一女尋殤繼姑虐甚逼之嫁誓死不渝舅姑卒遺夫幼弟三人氏撫之成立守節已四十六年

李寬妻王氏年二十九寬卒無子姑老氏勸翁置妾舉二子李氏賴以不絕守節已四十二年

傅檢身妻馬氏年二十七夫亡紡績以養守節已四十一年米元凱妻寇氏年二十一于歸元凱幼患瘋迷授室後仍愁癡不省人事一日外出不歸氏年二十三撫夫姪爲嗣姑歿事舅益謹後嗣子婦偕亡均撫孤孫苦節終身

楊維垣妻王氏年二十五夫亡與孀姑賈氏同寢處賈不見媳食亦不甘歷數十年如一日同時陳淩妻王氏年二十八

撫孤守節馬德良妻趙氏年二十二撫嗣子守節姑皆失明
王趙扶持奉養皆厯十餘年不少懈以節終

盧祺妻孫氏年二十三夫亡孝事舅姑訓子樹敏入庠又監
生劉鳳翔妻都氏年二十一夫亡姑病卧六年事之彌謹撫
夫姪爲嗣均守節終身

李士珍妻馬氏年二十九夫亡撫孤邦泰守節姑病扶持不
懈已而徧體瘡膿不能著席氏藉絮滌穢竭力侍奉二年如
一日守節已三十一年

馬培元妻唐氏年二十三夫亡性至孝舅姑怒必長跪自責
舅姑感其孝終歸和順姑歿事繼姑尤謹子金銛早卒偕媳
曹氏并以節稱

謹案申周屏妻劉氏以下三十三人道光二十九年知州

寶皆爲詳請巢旌在案

王元鵬妻郝氏年二十二夫亡子甫彌月以病軀侍姑疾晝夜不怠姑歿遺夫弟數月妹數歲并撫之成立訓孫鱣堂入庠守節已三十七年

俱同上

李文炳妻李氏年二十夫亡撫嗣子守節舅失明姑卧病氏起居扶持至老不衰卒年七十有五

州續志

王開基妻張氏年二十五夫亡舅姑相繼歿家赤貧妹憐其苦諷之他適氏斥之絕往來苦節十三年以窮餓死

王肇先妻賈氏年二十九夫亡子凌雲甫三月姑逼之嫁不從姑病奉侍獨勤撫孤成立卒年六十有七

鄭遇清妻韓氏年二十六夫亡撫嗣子孝事孀姑四十年同時王廷秀妻韓氏年二十七撫嗣子守節舅姑病癱卧牀四

年朝夕侍奉不少懈

吳廉法妻王氏年二十二夫亡撫夫姪培申爲嗣守節已三十五年

孫裕德妻沈氏年十九夫亡事祖翁及孀姑盡孝祖翁歿後夫弟郁文不治生產家中落氏出紡績資佐之有以分爨爲言者氏不忍郁文病且雙瞽氏爲籌醫藥日久不怠撫其子培元成立守節已三十餘年

齊宗道妻馬氏年二十七夫亡子殤夫堂兄謀奪其產致訟氏擇族姪上善爲嗣訓之成名守節已三十六年

監生劉廷魁妻王氏年二十二夫亡撫夫姪龍祥守節孝事舅姑娣王氏廷傑妻年二十一寡撫夫姪龍吉與姒同守節皆已三十餘年